

**QUINTA SESSIONE STRASURDINARIA DI U 2018**  
**SEME SESSION EXTRAORDINAIRE DE 2018**  
**28 è 29 DI GHJUNGHJU**  
**28 ET 29 JUIN**

**2018/E5/041**

**REPONSE DE MME Josepha GIACOMETTI, CONSEILLERE EXECUTIVE DE CORSE,  
A LA QUESTION DEPOSEE PAR M. Romain COLONNA**

**AU NOM DU GROUPE « FEMU A CORSICA »**

**OBJET : U CASTELLU DI A PUNTA : TRAVAGLI D'URGENZA E PRUGETTU  
PATRIMUNIALE**

Sgiò Cunsiglièru,

U Castellu di a Punta chi supraneghja u rughjone hè un fanale pè tuttu u circondu aiaccinu è pè ogni Aiaccinu. Hè cunsideratu tandu com'è una ricchezza patrimoniale ancu al di là.

Stu casale, custruitu da a famiglia Pozzo di Borgo, è statu classificatu Munimentu Storicu.

Pruprietà di l'anzianu Dipartimentu di a Corsica Suttana dapoi u 1992, hà fattu l'ugettu di parechji prugrammi di travagli ch'ùn so mai stati seguitati, malgratu u finanziamentu prupostu da l'anziana CTC.

Per via di issi riporti successivi, ci hè oghje l'ubbligazione di travagli d'urgenza di pettu à u statu sanitariu pessimu di u casale (messa in periculu di a stabilità di l'edifiziu), duppiatu da una messa in sicurezza indispensabile di e so strutture principale esterne.

Di pettu à issa situazione d'urgenza imperativa pè a salvezza di stu patrimoniu assignalatu, l'anzianu CD di a Corsica Suttana hà trigatu à lancià un'operazione di ristoru, è ci hè vulsutu aspittà 2017 da ch'ellu sia vutatu un creditu di 1 500 000 eurò pè i travagli d'urgenza è di sicurizazione di u castellu è di i so cuntorni, chì a so ricezzione hè privista pè u 2019.

A stima di u costu glubale pè un ristoru generale, da permette una riapertura à u publicu, ghjunghje à circa 15 milioni d'Eurò TTC.

Al di là di a risarcita di l'edifiziu ci hè dinù a prublematica di l'accessu, chì per avà hè à sensu unicu.

In quantu à un mezu d'accessu assai di più attrattivu è rapidu tutte e soluzione sò studiate...

Stu cartulare hà fattu dinù l'ogettu di una dumanda di suvvenzione sin'à 63 % à tittulu di u PEI. Issi travagli venenu in seguitu à u diagnosticu apprufunditu di u munimentu chì hà ricivutu l'accunsentu di u Cumitatu Scintificu d'ottobre di u 2017.

Eccu l'avanzamentu di u cartulare oghje : i studii ne sò à a finalizazione di a fasa PRUGETTU. A messa in anda di a consultazione pè i travagli cuminciarà di sittembre 2018.

À 'ssu titulu, sò stati scritti 250 000 € à u BP 2018 aduttatu da l'Assemblea di Corsica. Serà fatta un'antra anàlisi di i bisognu in u quattru di l'appruntera di u BS 2018.

Vogliu aghjustà chì u Cunsigliu Esecutivu tene i so ingaggiamenti nantu à stu cartulare per rializà i travagli d'urgenza quist'annu, è ch'ellu hà da cuntinuà à impignassi. Puru 'ssi travagli ùn basteranu da arregulà a situazione di u castellu di a Punta s'è no vulemu purtà una visione ambiziosa. Ci vole dunque à mubilizà prestu u COPIL è u cunsigliu scintificu. Mubilizaraghju in 'ssu sensu l'associu di l'amichi di a Punta, l'attori publichi è privati chì ghjudicheranu nicessariu d'impignassi pè a salvezza di u nostru patrimoniu.

Dumanda una vicinanza glubale di u prugettu, postu chì si pone una prublématica d'accessu è di valorizazione di u situ. Chjama dunque un impegnu cullettivu di l'inseme di i partinari ! Ma sappemu dinò ch'ellu ci vole à pinsà, subbitu avà, à a finalità di a valorizazione pè sappè chì strategia finanziaria ci vulerà à mette in ballu.

Feremu di manera à sviluppà un prugettu chì possa viaghjà à long'andà, in quantu à u funziunamentu cum'è a valorizazione.

L'été capita, di modu generale pè l'inseme di a nostra pulitica patrimoniale, ci vulerà à fà e scelte di ristoru, di valorizazione, è di finanzamentu, pè u riacquistu economicu, postu ch'ellu hè ancu una risorza, ma dinò un riacquistu suciale, val'à di dà torna un sensu à u nostru patrimoniu, riccu, diversu, è chì custituisce ciò chì serà, dinò, a nostra làscita à e generazione à vene !

Vi ringraziu.